

重鐫福幼遂生廣生編序

僕童年失怙。幼奉先大父蘭泉公訓曰。先追一本之源。而後禮神。先播活人之書。而后體物。若乾隆時。常州武進莊在田先生所著。福幼編。遂生編。誠拯人之慈航也。惜其書寥若晨星。汝盍勤求誠送。完我素志云等囑。嗣不敏。初搜於申吳善書局。繼尋於各處舊書店。結果無購者。冀圖翻印。苦鮮善本。孜孜於心。已有年矣。第自今春。修葺祖屋。恭檢謹藏。

列祖書籍。得古本福幼遂生兩編合刻。一整一殘。原書兩集。如獲至寶。讀福幼編。深辯慢驚。急驚。剖別虛寒。實熱之不同。分道揚鑣。劃示兩途。惟遂生編。是痘疹寶筏。索陰陽之祕奧。闡先賢所未發。見厥論病之精。立方之神。照此對證服藥。不難起死回生。以福幼遂生。名稱

其實堪作萬世指南。憶昔兒子永昌。曾抱吐瀉角弓慢驚之證。被庸醫以芩朮等藥斃之。今讀莊公書。令學人以溫補法。能生之。余若早諳是書。昌兒或不致死。如果死有常定。

聖王作何醫藥。且諺云。活者無常。第活既無常。則死期當然無常。可見人生壽命。果無一定。全在乎攝生而得藥。則慶更生者比比矣。至於痘證。自前清光緒初年。幼孩改種牛痘。業將週甲。法果甚善。奈間有怠種。或毒藏陰深。屢種不出。一朝天花盛行。非對證之藥。不能療。年來殞其命者。實非少數。皆緣痘證失傳。而不克補偏救弊所致。如能珍藏是書。以備緩急。出資翻印。遍達天下。自救救人。莫善於此。今將原書重校。稍事疏釋。捐資醵鑄。壽諸白簡。敬承先志。而神其傳。並以簡末。增印寥氏廣生編。誠是臍風祕訣。確有奇

驗。爰合成編。公諸世界。溥福幼稚云爾。是爲序。

時

中華民國二十三年歲次甲戌嘉平月。

祇園圃者。東越耀庭張武銑。序於杭州古湖心
亭舊址之治心軒。

注 意

顧是書初刻於前清乾隆。續印至咸豐拾年秋爲止。至今失傳已七十有五載。以致慢驚不治。天花累斃。惟願海內君子。翻印遍施。保赤壽世。天必廣嗣賜福。此感彼應。毫髮不紊。證諸先哲。拯生命。全嗣續。輒受彼蒼奇付嘉獎。古今各處。皆有芳範。第以是書佈世。世界赤子全活。奚止億千萬兆。按茲事實。較諸普通救濟之上。似與尋常陰隲不克同日而語也。至於得是書者。慎弗泛泛讀過。不然胸無確見。一旦兒女病危。仍呼奈何而已。是以尤貴預先細讀。詳如體察。可操起死回生之功耳。

東越耀庭張武銓謹識

序

小兒慢驚。自古以爲難治。得是證者。其家大約置之不理。坐以待斃。余家子姪。以此證殤者不少。今年夏。幼子河徵。年未及晬。因出痘後。薤髮太早。感冒發熱。延數醫診治。均投以清涼之品。服之逾旬。熱甚病劇。遂成慢驚。始則寒熱往來。輾轉床蓐。左右翻騰。兩手撮空。不哭不食。繼則眼閉身冷。顙門下陷。奄奄一息。喉間痰涎纏結。咯咯作響。時或手足抽掣。角弓反張。針灸並施。衆醫束手。家人將待其僵。以置諸木。先數日。余得是編。屢商諸醫。均謂無此治法。余以兒旣垂斃。服溫劑危。服涼劑亦危。遂私用附子五分。雜羣藥灌之。踰時痰少活。因以溫補連日並進。竟獲痊愈。始嘆此編。發前人未發之奇。救人世不救之病。所當家置一卷。而臨證切勿稍有遲疑也。

時

咸豐十年孟秋月

督河使者黃贊湯識

序

范文正云。不爲良相。卽爲良醫。良相和陰陽造民命。人之生死係焉。良醫之用心。猶是。豈可以小道視之乎。嘉慶己卯夏。兒子養田。忽患慢驚。醫者謂抱龍丸可愈。以一丸進。而疾轉危。時粵西鄧環五先生。權篆延川。出福幼編見示曰。此武進莊在田先生所著。治驚最能奏效。書中所載抱龍丸。與慢驚之症大相左。乃依其方。投以辛熱之藥。一劑而愈。亦以爲偶然耳。道光元年秋。養田又感寒疾吐洩。越三月。兩目瞠然。前陰已縮。萬無生理。因憶先生編中。加味理中地黃湯。凡小兒精神已虧。氣血大敗。形狀狼狽。瘦弱至極者。此方可治。因如法濃煎。頻頻灌之。初則氣若游絲。一劑而啼。再劑而有生色。至三劑則呱呱索乳矣。調攝旬餘。居然壯實。此與返魂香何異。何其術之神也。聞先生曾牧民於江漢。使

登廊廟。則其懷保斯民者。與良相何異。余佩先生之德。因名養田曰莊生。誌不忘也。恐窮鄉僻壤。未能共睹。是編。故鐫諸梨棗。以廣其傳。並記其神驗如此。

時

道光二年壬午仲夏

武陵葉樹頓首拜

序

人無誤生之病。而有誤人之醫。醫無誤人之心。而有誤人之技。良由未得其法耳。乾隆乙巳年。余權牧荊門。毗陵莊君。亦暫權少府。見其辦事精詳。不知更爲醫中聖手也。適僕隨患發背腰疽兩處。堅腫形如覆碗。勢甚危篤。醫者以爲七惡俱備。此僕亦自分必死。莊公笑曰。是症何難。且可計日愈。不用刀針。不加敷藥。煎藥六劑。兩毒如失。又署中老嫗。向患瘰癧。今患對口大疽。醫辭不治。莊公爲之開方。旬日間。非但對口全消。瘰癧亦愈。（按此兩症。均用方藥消除而愈。必陽和湯也。若果皮色不變的陰症瘡。如乳巖。惡核。瘰癧。石疽。軟疽等症。或慢腫無頭。或堅硬如石。及痛與不痛之一切惡疽。破則外貼陽和解凝膏。而內服此方。不破則不用刀針敷藥。服此方內消。揣量飲酒。謹戒房事。未有不愈者也。）倘驟起紅腫。號痛不已。呼大癰而小癰者。是陽症瘡也。宜投清涼敗毒。慎弗悞服此方。致火上添油。切

切注意。

方用大熟地壹兩

真鹿角膠叁錢

上肉桂壹錢研沖

生甘草壹錢

炮薑五分

麻黃五分

白芥子貳錢打包煎

藥選道地。戥須秤準。

酒水各半煎服。無論寒暑。請勿擅自增減。多服至消爲度。

（張武銑疏）先

後數人歷試不爽。凡痘毒等症。無不應手而痊。因問其故。乃知莊君昔曾患病。日久不愈。遍訪名師。兼以身試。十餘年來。甫能就痊。蓋真得岐黃真諦。丙午春。余孫康寧。甫二歲。病後慢驚。諸醫束手。余亦以謂此自古不治之症。急延莊公視之。用溫補藥。一劑驚止。二劑全愈。余莫之解。數月後。詢其故。莊君乃出示所著福幼編。所開卽編內方也。付之棗梨。已經十載。緣茲捐俸重刊。廣爲印送。得此書者。倘以爲寧從其同。不從其獨。疑而不用。只可云患者之命矣。是爲序。

時

乾隆五十一年歲次丙午桂月 襄陽府通判年家眷寅弟高舉拜撰

福幼編序

世之醫者。委云小兒無補法。只此一語。禍延靡極。夫小兒臟腑柔嫩。經脈未充。易於受邪。偶遇身熱惡食。稍爲和解足矣。乃醫者。每以不消不補輕淺之劑。愈則可以居功。未愈亦可以免謗。否則必消導發散。兼用寒涼。殊不知風藥多。則陰血受傷。而多汗亡陽。氣亦隨耗。若再用苦寒傷胃。俾陽明無司運之權。而太陰脾經。亦失傳送之度。以未充之經脈。柔嫩之臟腑。受此無窮之消伐。慢驚之所由致。端在是也。當此之際。尙不亟思補偏救弊之法。猶謂邪未盡。而熱未除。必迫之。萬無可生之路。而後已。殺人毒手。未有慘於此者。夫慢驚乃虛寒之故。亦有無所因而內發者。此根於稟賦本虛。陰陽失互相生長之機。漸形歇絕之狀。惟審其偏勝力爲補救。庶幾十得七八耳。若猶以外因治之。縱使稍爲和解。

殺之亦至捷也。今讀毗陵莊在田先生福幼編。其言慢驚致病之由。則究本窮源。治法絲絲入扣。立方則審其陰陽之辨。而直中其款竅。古有活人書。此其是矣。因亟付之梓人。廣行於世。俾醫者覺迷途於未晚。而世間赤子全活者。奚止數萬萬而已哉。是爲序。

時

乾隆四十二年丁酉歲季夏

賜進士出身

誥授朝議大夫知陝西蘭州府事吳門姻家眷

弟慕豫生拜撰

保赤全編總目

福幼編一卷

遂生編一卷

廣生編一卷
附種痘簡易良方

福幼編

凡例

(一) 此編專以溫補見長。凡小兒既成慢驚。必於後開條目。內有數處相合者。卽放心照方服藥。勿謂此書與古方清熱散風之藥不同。仍泥用古方。以自悞也。

(一) 此編凡鹿茸人參等貴重難覓之藥。悉不開入。恐窮鄉僻壤。及無力之家。不能購覓。雖有對症良方。亦束手無策也。

(一) 此編內之藥。隨處皆有。無論貧富貴賤。皆力所易爲。但必須另包過戥。如法泡製。方可取效。

(一) 近代所賣之抱龍牛黃等丸。皆係清熱化痰之藥。急驚最爲對症。若慢驚之甚者。下喉卽死。

(一)急驚與慢驚。全屬相反。急驚之症。小兒氣體壯實。前數日發燒。今日鼻中氣熱。大便結。小便燥。忽而驚風大作。喉中多有熱痰。用抱龍牛黃等丸。下喉卽醒。再用清熱消導之藥。一劑而安。本欲附方於此。恐治慢驚者。先用治急驚之方。則爲害非小。是以姑述其由。而方不叙入。慢驚總是病後虛寒。氣血不足。虛極生風。非脾腎雙補。薑桂同進。如何能愈。

(二)薑桂附子。乃編內藥方中之用神。減去則無效。肉桂好者難得。薄桂。潯桂。但新鮮而有油者。皆可用之。所以本草備要云。肉桂有油者俱佳。無所分別也。

(三)慢驚之輕者。理中地黃湯。內多用薑桂。亦可治愈。若虛寒至極者。非用附子不可。但附子性熱。人多畏之。本草附子下。亦註明治慢

驚字樣。可見溫補二字。委係治慢驚秘訣。無所疑也。

(一)此編新立二方。以治慢驚。明言慢驚屬虛寒。溫補卽所以治慢驚。急驚屬實熱。清熱卽所以治急驚。二症有寒熱之殊。用藥有雲泥之異。古人每以一方治二病。未究其致病之根源。深不可信也。

(二)近代醫家。皆云慢驚一症。先須驅風化痰鎮驚。往往用金銀器物煑水。仍煎發散消導之藥。愈治愈危。未聞治愈一人。良可嘆也。

(三)海內醫書。未可枚舉。諸子雖各執一見。議論紛紜。然失之於此者。仍得之於彼。惟慢驚一症。自古及今。相承錯謬。殊堪扼腕。是以此編專辯慢驚一症。與各書不同。節次試驗有效。深信不疑也。

(四)此編乃獨得之奇。實發古人不傳之秘。凡小兒久病不愈。諸病之後。均能轉爲慢驚。真得之最易。而醫之最難。世人但知清熱散風。